

Pueblo i Polítikonan

E sonido kustumbrá di trafíko di tur dia ta remplasá e pitamentu. Outonan ku tabata kubrí ku poster, steker, i bandera atrobe ta revelá e koló ku nan a haña di e fabrikante. Bòrchinan ku nan propaganda polítiko ta desparesé. Banderanan kolorido, asotá pa bientu di kuaresma ta blikia den solo. Elekshon ta tras di lomba. Pueblo a papia.

Awor nos por krusa man, sinta wak kiku e polítikonan viktorioso ta bai hasi pa NOS. Nos lo paga bon tinu si nan ta kumpli ku nan tarea manera debe ser, esta, segun NOS konsepto. Nos lo ta kla pa piki kada pieu ora nan ta pifia. Nos lo averiguá si nan ta traha na bienestar di pueblo, spesífikamente MI bienestar. Nos lo husga nan, kritiká nan, papia riba nan, eksigí nan koperashon i keha ora nan no ta hasi loke NOS ta deseá.

Ma un aktitut asina ta korekto? Nò! Un presidente merikano a reta su paisanonan: "No puntra kiku bo pais por hasi pa bo. Puntra kiku bo por hasi pa bo pais." Si nos apliká e konseho ei pa ku nos gobènantenan, nos aktitut pa ku nan lo ta otro. Nos lo ta konsiente ku no ta nan so ku tin un deber pa ku pueblo. Pueblo tambe tin un responsabilidadat pa ku su lidernan polítiko.

Kiku ta responsabilidadat di pueblo pa ku e mandatarionan di su pais? Palabra di Dios ta hala nos atenshon na sikiera tres punto.

Pa di promé, ta klaro ku nos tin e deber di obedesé e mandatarionan di nos pais. "Someté boso anto na tur ordenamentu di hende...sea ta rei, teniendo poder supremo, sea ta gobèrnadónan, komo esnan ku ta mandá p'è..." (1 Pedro 2:13-14). E apòstel Pedro a skirbi esaki tempu ku un burdugu, Nero, tabata emperadó romano. Poko aña despues, Pedro mes a muri na man di Nero. Ma e echu ei no a dun'é libertat pa rebeldiá kontra e mandatario ei.

Beibel ta kòrda nos ku kada gobèrnante ta haña su puesto di Dios. "...e Altísimo ta gobèrná reino di hende, i ta duna esaki na esun ku E kier" (Daniel 4:25). (E echu ku Dios ta kita un mandatario i ta pone un otro no kier men ku Dios ta aprobá di loke nan ta hasi.) Komo ku kada gobèrnante ta haña su puesto di Dios, ta klaro ku rebeldia kontra gobièrnu, ta rebeldiá kontra Dios. "Tur alma sea sometí na e poder superiornan ku ta poné riba nan; pasobra no tin ningun poder sino di Dios, i e podernan ku ta eksistí ta ordená di Dios. Asina esun ku lamta kontra e poder, ta rebeldiá kontra òrdu di Dios" (Romanonan 13:1).

Di dos, Skritura santu tambe ta mostra ku nos mester "onra rei" (1 Pedro 2:17). Ta bèrdat ku tin polítiko ku no ta meresé e onor i respet di pueblo pa motibu di nan bida òf kondukta. Ma esei no ta libra nos di nos deber pa respet'é pa su puesto. Awor ku elekshon ta tras di lomba, nos mester lubidá nos diferensianan di opinion polítiko. Sea ku bo partido òf kandidato a sali viktorioso òf nò, ta bo responsabilidadat pa respetá esnan ku a ser selektá.

Un di tres responsabilidadat ku Dios ta duna suidananan di un pais ta pa hasi orashon "pa reinan i tur ku ta okupá puesto di importansia" (1 Timoteo 2:2). Nos reina, gezaghèber, ministernan, diputadonan, èts. tin mester di sabiduria ku Dios so por duna. E kapasidat mental humano no ta sufisiente. Dor di orashon di esnan ku ta Su yunan, Dios ta duna sabiduria i asta ta influensia e desishonnan di gobènantenan. "Kurason di rei ta manera riunan di awa den man di SEÑOR; E ta bir'é na unda ku E kier" (Proverbionan 21:1).

"Kiku mi por hasi pa bo, señora?" Abraham Lincoln, un presidente di Merka den pasado a puntra e señora di edat atvansá. "Señor presidente, mi a bin aki awe no pa pidí un favor pa mi mes òf otro hende. Mi a tende ku bo ta gusta kuki mashá, i mi a bin pa trese e kukinan aki." Awa a yena wowo di e presidente; pa un ratu e no por a papia. Anto el a bisa, "Señora, bo konsiderashon i falta di interes propio ta tokámi. Miles di hende a bin na e kantor aki desde tempu ku mi a bira presidente, ma abo ta e promé pèrsona ku a bin i no a pidí algu pa bo mes òf otro hende."

Nos gobènantenan ta hende méskos ku nos. Nan tin ku soportá hopi kos. Bo por enkurashá e lider polítiko dor di un akto simpel òf un palabra apropiá. Sigur esei ta algu ku kada mandatario lo apresia.